



PARTII INUIT INATSISARTUNI

7. August 2013

UKA 201/137

Inatsisartut suleriaasianni § 36 naapertorlugu apeqquteqaatit aallaavigalugit oqallisissiaq.

Qallunaatut piginnaasaqqaanngikkaluarluni ilinniarfinnut isersinnaaneq qanoq aqqtissiuunneqarsinnaava?

Ilinniarfeqarfiit ullutsinni immaqa “pisariaqavinngittumik” qallunaatuunerusoq ingerlasut qanoq kalaallisut ingerlanneqarnerulernissaat anguniarsinnaavarput?

Ilinniarfeqarfiit suut siunissami qaninnermi annermik kalaallisut imaluunniit kalaallisuinnaq ingerlalersinnaanerat siunertaralugu oqallinissamik siunnersuut.

(Inatsisartunut ilaasortaq Randi Broberg, Partii Inuit)

Tungavilersuut

Qallunaatut oqalussinnaasariaqarnerup qassimmitaava ilinniagaqarnissaraluat unitsinnikuuaa?

Qassimmitaava qallunaatut pikkorlunnertik piinnarlugu ilinniarusutaminnut tunuartiinnartarpat.?

Partii Inuit isumaqarpugut Namminersuleriartornitsinni nammineerluta ilinniarfiutigit kinaassuserput oqaatsivullu aallaaviginerullugit ilusilersornissaannut immitsinnut piumaffiginerunissarput pissusissamisoortoq. Oqaatsit allat mattutinngikkaluarlugit.

Ullumikkut pissutsit qiviraanni qallunaatut oqalussinnaanerup inummut nalilersuutaasarneralusoq inummut qallunaatut pikkorluttumut qanoq sunniuteqapiluttarnera tamatta takorloorsinnaagunarpurput ilaatigullu immaqa kalaaliusugut tamatta minnerusumik annerusumilluunniit inuunitta ilaani tamanna misiginikuuarput. Imminut naleqanngittutut misigineq, atorsinnaanngittutut misigineq sorpassuarnik kinguneqarsinnaasoq takorluuinneqarsinnaavoq. Tamannalu immiini nunatsinnut inuiaqatigiinnullu taama ikitsigisunut naleqaqaaq.

Taamaammat Kalaallisuinnaarlunniit oqaaseqaraluartilluta ilinniarnissamut periarfissagut annertusartigit, kalaallisuinnaarlunniit oqaaseqaraluartilluni ilinniarusutamut isersinnaaneq pisinnaatitaaffinngorli.

Aporfittut isigisagut unammillertigit, oqaluuseriinnarnagillu qanoq iliuuseqarfigitigit.

Ilinniasiat kinaassutsitsinnut tulluussartigit, nutserneqartariaqartullu nutsertitsigit. Ilinniartitsisuuneq immikkut orniginarsartigu, kalaallit ilinniarfinni qaffasinnerusuni ilinniartitsisunngorumasut amerlisarneqarnissaannut kajuminnerulernissaannullu aqqtissiuutsigit.

Nunami inuuffimmi soqutigisagut pikkoriffillu ilinniarumagaanni oqaatsit aporfiunatik pisinnaatitaaffik tamanut atuutilerniarli.